

A.T.A ta yama danki na Celeste Koolman cu tambe ta contribui na un Aruba mas dushi



ORANJESTAD - Aruba Tourism Authority a lansa e campaña 'Danki Aruba' den e espiro di fin di aña. Pa medio di e campaña aki ta reconoce heroenan cu ta haci di Aruba uno dushi pa biba y como tal uno dushi pa bishita.

E ciudadano ehemplar cu ta wordo reconoci ta Celeste Koolman, un persona hopi alegre y dedica na e trabou boluntario cu e ta haci na Cas Marie.

Celeste ta wordo mira como un persona cu ta hopi fiel na e clientenan di Cas Marie. Como boluntario Celeste a sostene e fundacion pa 9 aña largo caba y ta enfoca na keda yuda como boluntario y no como un miembro di per-

sonal di Cas Marie. Celeste stima e trabou cu e ta haci y e ta wordo mira como un bon colega cu semper ta cla pa yuda tur hende.

Coleganan ta bisa cu 'semper Celeste tey pa nos tur y e ta hopi stima pa tur nos clientenan'. Celeste ta un ehemplar pa comunidad y e la wordo

sorpesa pa Lisette Does, coordinadora di Cas Marie, cu a hiba palabra y a honra su persona pa su dedicacion na e fundacion. Celeste a sinti hopi emocion y no a spera di a wordo reconoci pa su amor y dedicacion na fundacion Cas Marie.

Cas Marie ta un fundacion cu

a wordo funda na aña 2006 pa señor Boy Escalona, su motivacion pa lanta un fundacion pa yuda esunnan cu demencia, tabata personal y dedica na su casa cu tambe a sufrí di e enfermedad. Fundacion Cas Marie ta carga e nomber di su casa y e aña aki e fundacion a cumpli 10 aña di existencia. Cas Marie ta un fundacion cu ta yuda famianan desde e prome momento cu nan ta sospecha cu por trata di demencia. Cas Marie ta brinda guia, sosten y of pasa dia durante henter e proceso na e famianan y e cliente. Cas Marie tambe ta ofrece na tur interesado informacion tocante sindromanan di demencia. E meta di Cas Marie ta pa aporta na un manera positivo y profesional na e calidad di bida di e persona cu demencia y nan famia. E team di Cas Marie ta chikito, multi disciplinario, profesional y dinamico. E base cu ta uni e team di Cas Marie ta e amor pa e trabou. E team ta consisti di un enfermera, dos guia di grupo, un terapeuta di actividad, un psycholoog y e boluntarionan. Fundacion Cas Marieta miembro di e

plataforma Demente Aruba, caminda hunto cu otro partnernan ta trata di innova y mehora e cuida caminda cu por. E otro miembronan ta WGG, SABA, HAVA, DsZ. Celeste ta un boluntario cu ta yuda tur dia na Cas Marie y semper ta dedica su tempo na yuda e fundacion bay dilanti.

Ta danki na esfuerso boluntario asina riba nos isla, e persistencia y bon voluntad nos isla ta resalta. E factor principal di nos turismo ta nos hendenan, nos mes, y p'esey A.T.A. kier presenta un mensahe di reflexion e aña aki pa medio di 'Danki Aruba'. Yamando danki na personanan ehemplar manera Celeste Koolman. Danki Celeste. Semper cu un sonrisa Celeste a comparti y duna otro un humilde man, dunando su aporte aña den y aña afo. Esakinan ta sigur caracteristicanan cu mester pa no solamente nos turismo desaroya na un manera duradero y saludabel, pero pa simplemente nos comunidad por biba na un manera feliz, den harmonia cu otro. Subi online ariba www.dankiaruba.com pa sigui e campaña di 'Danki Aruba' y tambe ariba e pagina di Facebook y Instagram di Oficina di Turismo Aruba. Den nomber di Aruba Tourism Authority nos kier gradici cada un di nos hendenan pa nan lucha incansabel durante 2016 y kier desea nos comunidad feliz dianan di fiesta y un One Happy 2017.

